



# GRACE, ET ABOLLITION

*donnée par le Roy a ses sujets qui ont suivy*

*M. de Montmorancy en ces derniers trou-*

*bles du Languedoc.*

*NN. 4. p. 1221.*

**L**OVIS PAR LA GRACE DE  
DIEU, ROY DE FRANCE  
ET DE NAVARRE. A tous pre-  
sens & à venir salut, le respect & la re-  
uerence qui est deuë a nostre autorité,  
ayant esté blessée par la rebellion de  
plusieurs Seigneurs, Gentil-hommes,  
& autres de nos subiects de nostre Pro-  
vince de Languedoc & pays adiacents,  
nous aurions iuste raison de nous seruir  
de la puissance que Dieu nous a mise és  
mains pour chastier les rebelles, afin  
de ne pas donner iour aux crimes par  
l'esperance de l'impunité, & intimider  
par ce moyen ceux que la seule crainte  
peut retenir dans le debuoir, mais d'au-

tant que ceux qui ont fuiui les armes de nostre Frere vnique le Duc d'Orleans, & adheré a la rebellion du feu Duc de Montmorancy sont en grand nombre, & que rendant la punition aussi generale que la faute, il y auroit à craindre, quelques considerations que l'on y peu apporter que ceux qui ont esté plus attachés a ce party par malheur que par mauuaise volonté contre nostre seruice, ne se trouuassent enuelopez dans la disgrace des plus coupables, & d'ailleurs considerant que l'autorité souueraine n'a pas moins d'esclat dans les actions de la clemence, que dans celles de la Iustice, apres auoir pacifié nostre Prouince, faict faire vne punition aussi exemplaire dudit Duc de Montmorancy que l'enormité de son crime le pouuoit meriter, & receu de tous nos subiects dudit pays vne prompte & entiere obeissance. Voyant maintenant, la pluspart desdits Seigneurs,

Gentil-hommes, & autres reffugiés hors nostre Royaume, & dans la frontiere d'Espagne recourir en suite à nostre bonté, comme a l'vnique reffuge de leur salut. Nous auons estimé ne deuoir refuser aux tres-humbles supplications qui nous ont esté faictes par nostre tres-cher & bien aymé cousin le Duc d'Halluyn Pair de France, Gouverneur & nostre Lieutenant general audit Languedoc, avec les respects & submissions conuenables, le pardon & l'oubly des choses passées sur l'asseurance que nostredit cousin le Duc d'Halluyn nous a donnée pour lesdits reffugiés dudit pays, qu'ils se comporteront à l'aduenir selon leur deuoir, & ne se despartiront iamais de l'obeissance & fidelité a laquelle ils sont obligés enuers nous, sçauoir, faisons que nous pour ces causes, & suiuant en cela nostre naturelle inclination, qui ne peut consentir a la rigueur & seuerité des punitions sinon

entant quelle est necessaire pour le bien  
de nos subiects, & seureté de nostre  
estat. Nous auons de nostre grace spe-  
ciale pleine puissance & autorité  
Royalle, esteint, assoupi, & abolly, &  
par ces presentes signées de nostre main  
esteignons, assoupissons, & abolissons,  
tous actes d'hostillité violences, & des-  
ordres qui ont esté commis par lesdits  
Seigneurs, Gentil-hommes, & autres  
nos subiects de nostre Prouince du Lan-  
guedoc & pays adiacents, leurs adhe-  
rants & complices, en quelque sorte, &  
maniere qu'ils soient aduenus durant  
ladite rebellion, & iusques à present, &  
ce faisant leur auons quitté, remis &  
pardonné, quittons, remettons, & par-  
donnons, tant en general qu'en particu-  
lier: tout ce qui leur pourroit estre im-  
putté à l'occasion des susdit crimes,  
mouuements, ports d'armes, & rebel-  
lions, sans que ores ny à l'aduenir, ils  
en puissent estre recherchés, mollestés,

ny inquiétés par quelque personne , & sous quelques pretextes que ce soit, leur remettant toute peine amende & punition , lesquelles pour raison desdits crimes , ils pourroient auoir encourus enuers nous & iustice , & a ceste fin, nous auons mis, & mettons au neant toutes les informations sur ce faictes , decrets, iugemens, & Arrests sur ce donnés , reuoqué , & reuoquons tous dons, & confiscations cy deuant accordé de leurs biens meubles & immeubles , & auons iceux Seigneurs , Gentil-hommes , & autres rebelles de nostredit Prouince, & pays adiacens, remis & restituez remettons & restituons en leur bonne fame, & renommée, & en leurs biens , imposant sur ce silence perpetuel a tous nos Procureurs generaux , leurs substituts presens & à venir , & tous autres à condition toutesfois de reuenir en leurs maisons dans trois mois apres la publication des presentes , & de faire leurs de-

clarations pardeuant les Iuges des lieux  
ou ils se trouueront domiciliés, fors &  
excepté neantmoins, les Euesques d'Al-  
by, d'Vzés, Lodeue, l'Abbé d'Elbeine,  
les nommés de Naues, Perault, & ses  
ensans, Valon, & de Mars, Penaultier  
Tresorier de la bource, Marcillas, S.  
Amand, d'Alzan Pere & Baron de Te-  
rian fils, que nous n'entendons aucune-  
ment exempter des iugemens, Arrests,  
& condamnations rendus, & à rendre  
tant contre leurs personnes que contre  
leurs charges, biens meubles & immeu-  
bles, si donnons en mandement à nos  
amez & feaux Conseillers les gens te-  
nans nostre Cour de Parlement à Tho-  
louze; que ces presentes non leuës de  
grace & abollition, ils facent lire pu-  
blier & enregistrer, & du contenu en  
icelles iouïr & vser plainement & paissi-  
blement lesdits Seigneurs, Gentil hom-  
mes, & autres nos sujetsz refugies du-  
dit pays & lieux circonuoisins, leurs ad-

herents & complices qui ont esté du parti de nostre Frere , & ont suiui ledit Duc de Montmorancy , & tout ainsi que si chascun d'eux y estoit particulièrement desnommé , sans permettre ny souffrir que ores ny à l'aduenir , il leur soit fait ou donné aucun trouble ny empeschement, au contraire , lequel s'y faiët mis ou donné leur estoit en leurs corps ou en leurs biens. Ils fassent mettre à pleine & entiere dessiurance en leur premier estat & deu , nonobstant toutes ordonnances, & lettres a ce contreuenue ausquelles & aux derogatoires y contenues. Nous auons desrogé & derogons par celsdite presentes , & afin que ce soit chose ferme & stable à tousiours, nous y auons faiët mettre nostre scel. Car tel est nostre plaisir , sauf & autre chose nostre droiët & l'autrui en toutes. Donné a Paris au mois de Mars, l'an de grace mil six cens trente trois, & de nostre reigne le vingt troisieme si-

gné LOVYS, & sur le reply par le  
Roy, Phelippeaux, & scellé du grand  
seau de cire verte en laqs de soye rouge,  
& verte, &c.

FIN.